



INTRODUCZIUN

DA FLURINA CAVEGN-TOMASCHETT

Igl evangeli da nossa pli gronda fiasta da cardientscha, la fiasta da Pastgas, entscheiva cun l'iniziativa dad ina dunna. Quei ei nunusitau! Igl ei Maria Madleina che va, malgrad ch'igl ei aunc tut stgir en ed entuorn ella, sin fossa da Jesus. Aunc ina davosa ga esser cun el, contemplar siu tgierp maltractau, seregurdar dil temps communabel. E forsa anflar ina ni l'autra risposta. Denton – enstagl da rispostas anfla ella ina fossa vita.

La fossa vita sto bein esser stau in schoc per la dunna. Jeu savess capir, sch'ella fuss stada bloccada e paralisada da quei schabetg. Denton il cuntrari: Maria Madleina semetta en moviment – e lu aunc co: ella cuora per parter si'experientscha culs giuvnals. E lezs selain tschaffar da quei moviment e cuoran anavos per sezs daventar perdetgas dalla fossa vita. Igl ei schizun da sentir ina certa concorrenza denter ils dus giuvnals. Tgeinin ei il pli spert?

Schibein Maria Madleina sco Pieder ed il giuvnal che Jesus carezava daventan perdetgas dalla fossa vita. La descripziun digl evangelist Gion lai negin dubi a quei fatg: il crap ruclau naven dall'entrada, ils lenzeuls giun plaun, il sudari cavegliaus dasperas. Clars indezis, ch'igl ei schabegiau enzatgei extraordinari; enzatgei ch'ei buca da capir cun il tgau, mobein mo cun il cor.

EVANGELI

Gn 20,1–9

¹Igl εμπrem di dalla jamna ei Maria Madleina vegnida la damaun ch'ei fuva aunc stgir sin fossa ed ha viu ch'il crap era dustaus dalla fossa. ²Cheu eis ella currida e vegnida tier Simon Pieder e l'auter giuvnal, quel che Jesus carezava, ed ha detg ad els: Ei han priu il Segner ord fossa, e nus savein buca, nua ch'ei han mess el. ³Sinquei ein Pieder e l'auter giuvnal i giuado ed ein arrivai alla fossa. ⁴Domisdus currevan ensemen, mo l'auter giuvnal ei currius ordavon a Pieder ed arrivaus igl εμπrem alla fossa. ⁵El ei staus giudavon ed ha viu ils lenzeuls giun plaun mo ei buc ius viaden. ⁶Uss ei era Simon Pieder che suandava el arrivaus ed entraus ella fossa. El ha viu ils lenzeuls giun plaun ⁷ed il sudari, cul qual il tgau da Jesus era staus cuvretgs; quel fuva denton buca sper ils lenzeuls, mobein zugliaus ensemen en in liug dapersei. ⁸Uss ei era l'auter giuvnal che fuva vegnius igl εμπrem alla fossa ius viaden; el ha viu e cartiu. ⁹En verdad vevan els aunc buca capiu ch'el stoppi, tenor la Scartira, levar da mort en veta.